

INUIT ATAQATIGIIT INATSIARTUNI



UPA2022/160

24. marts 2022

Mariia Simonsen

**Uunga siunnersuut: Ilinniartut ineqarfii pillugit Inatsisartut
Inatsisaata allanngortinnissaa pillugu Inatsisartut Inatsisaat.
(Naartunermi, erninermi meeravissiarternermilu
sulingiffeqartarnermut atatillugu ilinniartut ineqarfiissa
pigiinnartarnerat)**

(Ilinniartitaanermut, Kultureqarnermut, Timersornermut Ilageeqarnermullu
Naalakkersuisoq)

Ilinniartut ineqarfii pillugit Inatsisartut inatsisaannut allannguutissamik
Naalakkersuisut siunnersuutaannut Inuit Ataqatigiinnit ima oqaaseqassaagut.
Siullermik qutsavigerusupparput Ilisimatusarfimmi ilinniartut
siunnersuisoqatigiiffiat Pitaq, ilinniartut atugaat aporfiilu pillugit Inatsisartunut
Naalakkersuisunullu paasissutissiiginnaratik aaqqiissutissamik erseqqissumik
apuussimmata – soorlu matumani tamanna ersersinneqartoq.
Nunatsinni ilinniagaqassutsip qaffassartuarnissaa qanoq pingaaruteqartigisoq
tamatta ilisimavarput, taamaattumillu ilinniakkamik naammassinninnissamut
aporfiusinnaasut suugaluartulluunniit sapinngisamik
minnerpaaffissaaniitittuarnissaat isumannaarniagassaraarput.
Ilinniarnep nalaani meerartaartunut atugassarititaasut allanut naleqqiullugit
ajornerunerat pissusissamisuunngilaq. Aamma ilinniartut arnat angutillu
atukkamikkut assigiinngisinneqarnerat akuerinngilarput. Taamaattumik
ilinniartup meerartaarnermi kingorna ilinniartut ineqarfianni inimit
anisariaarulluni iniminik piginniinnarsinnaanngornera Inuit Ataqatigiinni
qutsatigaarput. Inatsimmut allannguutip erniinnannguaq, tassalu aasaru juulip
aallaqaataanit atuutilersinniarneqarnera aamma assut iluaraarput,
taamaalillutik ilinniartut aasap ingerlanerani meerartaartussat

INUIT ATAQATIGIIT INATSIARTUNI



erumassuteqaratik iniminniiginnarnissartik taamaalillugu
qularnaarsinnaalermassuk.

Taama oqaaseqarlunga siunnersuutip aappassaaneerneqannginnermini
ilinniartitaanermut ataatsimiitsitalimut suliaangortinneqarnissaa
innersuussutigaa, ataatsimiitaliarlu sulilluarnissaanik kissaallugu.